



Il gi da lavur cumina han ils umens dil chor viril tratg lenna, allontanau romma e resgiau plantas der-schidas dalla neiv.

FOTOS A. BEELI



Suenter ch'el ha sunau sez biars onns sco cornettist ella formaziun, ha Michael Cadruvi dirigiù l'emprega gada la Musica giuvenila Aspermont Sagogn.

Lavurs, giugs, musica e sorpresa

Fin d'jamna ordvart activa a Sagogn

■ **Contas personas ch'ein stadas engaschadas la davosa fin d'jamna ellas differentas activitads a Sagogn ei strusch d'eruir. Perinagada han sis uniuns ed organisaziuns envidau e clamau hosps e commembers a quater eveniments da different gener. Cunzun per il sector dalla cultura eis ei stau ina fin d'jamna pulpida.** Silla sonda vargada havevan ils adherents dil giug da golf spitgau vess: Suenter ch'igl unviern aveva interrut igl atun vargau dètg nunspitgadamein il menaschi han las preparativas per la reavertura dalla piazza da golf Sagogn-Schluen duvrau temps. Sonda vargada ei tut stau semtgau, il pastget ed ils greens ein stai en stan ideal aschia ch'els emprems giugadurs han astgau ir silla piazza. Ils hosps han gudiu igl areal e la cuntrada primavauna. Il gi d'avertura ei lu era staus sco fatgs per guder – sper il giug cun balla e bastuns – il verd intensiv cul tschiel blau ed ils tscherschers en flurizun. Pil club da golf Bunavista eis ei stau ina entschatta dalla stagiun pli che biala.

Cuors da troccas

Aunc d'ina altra specia da giug dis-

cuor'ins dapresent a Sagogn. Mintgamai il vendergis sera s'entaupa in triep gliedui ella sala dall'ustria Sil Plaz per emprendre il giug da troccas. L'uniun Pro Sagogn organischa suenter 12 onns puspei ina introducziun el giug tradiziunal sursilvan. En tut fan 18 personas dil vitg part dil cuors d'entscheviders. Els se-laian introducir ellas reglas d'in scart, cullas modas da tschintschar, igl ir entuorn cul bagat, cun narr e tut las autras figuras. Duront ina viseta spontana ella sala dil cuors ha ins viu mo fatschas seriusas, profundadas e concentradas el giug. Igl organisatur *Luis Poltéra* ha tschercau ed anflau ina oreifra collaboraziun cul Club da troccas Tödi da Glion. Il president *Andreas Casanova* e treis collegas capeschian d'entusiasmar ils participants. Il cuors en quater parts duei finalmeins empruar d'establi il giug da troccas era a Sagogn.

Lavur cumina dil chor viril

In cuntrast tier il giug vid la meisa ed en gruppas da quater han biebein 20 cantadurs dil chor viril mussau. Els ein serimnai la sonda endamaun sil plaz fixau a Plaun Pigniel per separticipar alla lavur

cumina. La stad vargada haveva la fundaziun Platta Pussenta envidau las uniuns da s'annunziar per in gi da lavur cumina a favur dalla cuntrada cultivada. Suenter che duas uniuns havevan gia igl atun vargau runcau caglias e fatg uorden el contuorn da Truccas e Plaun Larisch ha il chor viril retschier per la primavera ina incarica speciala: Cun entruidament dil selvicultur *Maurus Cavigelli* han els allontanau tieua e pégnis che la neiv haveva dersch igl unviern vargau. En in liug han ils umens dil chor viril tratg ensem rodund 12 cubics lenna e fatg mantuns cun romma e discharina. In'otra gruppa ha giu il pensum da far uorden el territori dalla Val Mulin. Leu haveva la neiv dil november dersch numerusas plantas ed interrut en plirs lohghens la senda da spassegiar. Ils umens en acziun han sez strusch saviu capir tgei disuorden ch'ina neiv greva sa caschunar. Il gi da lavur cumina dil chor viril ei era stau caschun da star da cumpignia e da mussar engaschi cumineivel ordeifer il local d'exercezi. Talas acziuns ein buca mo bunas pervia dalla schurnada che la fundaziun paga ella cassa dil chor. Ina lavur cumina sa dar impuls ed esser ina ba-

sa per anflar ideas ed analisar la stagiun da cant.

Musica giuvenila cun sorpresa

La sonda sera vargada lu il proxim eveniment a Sagogn: La musica giuvenila Aspermont ha envidau a siu concert annual. Quel ei staus dedicau al motto «15 onns musica giuvenila». Malgrad numerusas occurrenzas ella regiun ei la halla plurivalenta s'emplenida pulit pil concert. En tut ein 23 giuvenils sepresentai mussond il resultat final da lur exerchez jamnills. Pil dirigent *Michael Cadruvi* eis ei stau ina premiera: Il 15avel concert che la Musica giuvenila Aspermont Sagogn ha dau ei staus l'emprega gada sut sia bitgetta. El che ha entschiet sia carriera da musicant en quella formaziun ha mussau sias habilitads sco talentau menader. La musica giuvenila cumprova ch'ei vegn fatg musica cun ina clara finamira: Tener la qualitat e sviluppàr il plascher per buna musica da stuors. Duront las producziuns ha ins s'encurschiu bia motivaziun ed anim. Michael Cadruvi ha giu in bien maun d'eleger tocs varriants ch'els giuvenils sunan bugen e che han plaschiu agl auditori. Sco sorpresa

per la dirigenta e confundatura dalla musica giuvenila, *Michaela Cavelti-Lombris*, ha el surschau a lezza il davos supplement ch'els giuvenils han purschiu al publicum. Suenter ch'ella haveva menau 14 onns la formaziun ha Michael Cadruvi surdau ad ella la bitgetta per direger il davos toc.

Il concert dalla musica giuvenila ha cuntenu ina frappanta sorpresa. Denter las duas parts dil concert ei la musica dils veterans sepresentada. Ei setracta d'ina formaziun reschnova che secumpona dad 11 commembers dall'Uniun da musica Sagogn. Igl ei musicants che sunan denter 25 e 40 onns culla musica da Sagogn. Els ein semess ensem spontanamein per embellir la sera dalla musica giuvenila Aspermont. Tenor las reacziuns ed igl applaus frenetic digl auditori po ei buc esser la davosa gada ch'els «Veterans» ein sepresentai sin tribuna. Cun lur spontanitad e humor han els animau il publicum e franc era fatg impressiun als giuvenils che han gudiu igl «intermezzo». Nies vitg para cun quei da posseder ina attracziun culturala dapli.

Augustin Beeli

TCS Surselva ha undrau 18 superveterans

■ (anr/sb) Il TCS Surselva ha prest 4000 commembers. La sonda vargada ein 32 da quels stai alla radunonza generala che ha giu liug a Mustér. Il president *Armin Candinas* da Rabius ha presentau il rapport digl onn vargau ed il program per 2009 (La Quotidiana ha

rapportau surlunder la mesjamna vargada, ils 22 d'avrel). Il quen ei vegniun approbaus e suenter haver tractandau entginas tractandas ei il president selegraus d'astgar undrar 18 commembers dil TCS Surselva per lur commembradi da 50 onns sco super-veterans: *Peter Bat-*

taglia (Flem vitg), *Letizia Berther* (Rabius), *Clemens Casutt* (Falera), *Augustin Cathomen* (Breil), *Felix Derungs* (Rabius), *Jacqueline Gartmann* (Val S. Pieider), *Reto Gartmann* (Castrisch), *Franz Gerth* (Mustér), *Wendelin Hunziker* (Sursaissa), *Conrad Jemmi* (Flem), *Werner Jörger* (Laax), *Gabriel Lutz* (Rabius), *Heidi Ragetti* (Flem vitg), *Walter Schärli* (Fidaz), *Nicolaus Schlosser* (Glion), *Mario Schwarz* (Glion), *Josef Wetter* (Mustér) e *Werner Zweifel* (Laax). Otdad els ein stai presents alla radunonza generala e han guess giu da raquintar d'ina reminiscenzas davart il TCS e ses survetschs.

Super-veterans presents a Mustér:

Nicolaus Schlosser, Glion;
Werner Jörger, Laax;
Felix Derungs, Rabius;
Clemens Casutt, Falera;
Mario Schwarz, Glion;
Josef Wetter, Mustér;
Franz Gerth, Mustér;
Walter Schärli, Fidaz (da sen.).

FOTO F. ALIG



Matterhorn Gottard: Schmid remplazza Lauber

■ (anr/hh) *Jean-Pierre Schmid* ei niev president dil cussegl d'administraziun dalla Viafier Matterhorn Gottard. El remplazza *Daniel Lauber* che ha presidiu l'interpresa dapi la fundaziun igl onn 2003. Avon ei Lauber staus 12 onns president dil cussegl d'administraziun dalla BVZ (Viafier Brig Visp Zermatt). Ord lezza e la Viafier Furca-Alpsu ei sedada la Viafier Matterhorn Gottard. *Jean-Pierre Schmid* ei dapi 2003 commember dil cussegl d'administraziun dalla Viafier Matterhorn Gottard. Avon ei el staus 13 onns el cussegl d'administraziun dalla BVZ, da quei nov onns sco vicepresidente. Cun occasiun dalla radunonza generala dils acziunaris ei vegniu dau plaid e fatg davart igl onn passau sco era mirau egl avegnir. Malgrad la crisa globala dall'economia ein ils responsabels dall'interpresa plitost optimists pigl onn da fatschenta current. Las reservaziuns per il Glacier Express ein stabilas en cumparegliazun cun igl onn precedent. Annullaziuns ein stadas da constatar sulettamein dalla fiera englesa ed

americana. La viafier persequitescha cun atenziun il svilup oravontut en las tiaras cun biara clientella. Persuenter ha ella era scaffiu entgins pachets da mesiras, surtut per la Germania e la Svizra. Ultra da quei ein mesiras dalla vart dallas expensas semtgadas.

In problem che fatschenta il mument la Viafier Matterhorn Gottard ein las capacitads duront ils temps cun bia passagiers. Per puder dar il damogn al catsch da gliedui vegnan investiziuns ell'infrastructura ad esser necessarias. In studi dat clar sclariment nua ch'els problems essenzials ein. Ultra da quei vul l'interpresa era cuntinuar cun las investiziuns el material rullont per il traffic regional. In basegns d'investiziuns vesan ils responsabels era ell'optimizaziun dallas staziuns da Brig, Andermatt e Zermatt. A Zermatt vegn registrau onn per onn rodund treis milliuns passagiers, a Brig e Visp 1,5 milliuns ed ad Andermatt dapli che in milliun passagiers. Ad Andermatt ha ei era num tener quen dallas pretenziuns dil niev resort da vacanzas.